

Landssamband Delta Kappa Gamma

Framkvæmdarráðsfundur haldinn 3. september 2005 kl. 10:00-14:00 á skólaskrifstofu
Hafnarfjarðar, Strandgötu 31 í Hafnarfirði

Mættar voru: *Anna Þóra Baldursdóttir í Beta, Bergþóra Gísladóttir í Delta, Elín Rut Ólafsdóttir í Peta, Elínborg Sigurðardóttir í Epsilon, Eyrún Ísafold Gísladóttir í Eta, Gerður Guðmundsdóttir í Eta, Guðbjörg Sveinsdóttir í Peta, Halldóra Haraldsdóttir í Beta, Helga Thorlacius í Beta, Ingibjörg Einarsdóttir í Gamma, Kristín A. Ólafsdóttir í Eta, Kristín Thorlacius í Delta, Krístrún Ísaksdóttir í Gamma, Rósa K. Júlíusdóttir í Beta, Sigríður R. Sigurðardóttir í Alfa, Soffía Sigurjónsdóttir í Delta.*

1. **Setning fundar:** Ingibjörg Einarsdóttir forseti Landssambandsins setti fund, kveikti á kertunum þremur og bauð fundarkonur velkomnar. Hún bað síðan konur að kynna sig.
2. **Orð til umhugsunar:** Sigríður Ragna Sigurðardóttir formaður Alfa-deildar flutti “orð til umhugsunar”. Hún ræddi í fyrsta lagi um afleiðingar náttúruhamfaranna í New Orleans og velti því fyrir sér á hvern hátt samtökin okkar gætu veitt aðstoð. Hún hvatti konur til að skoða þetta á Netinu og benti jafnframt á að á heimasíðu samtakanna í Austin í Texas væri að finna upplýsingar um þessi mál. Í öðru lagi minnti hún á afmæli samtakanna hér á landi og að það væru 12 konur sem væru stofnfélagar. Þessar konur mætti heiðra sérstaklega, ef til vill á hátíðarfundum í nóvember.
3. **Fundargerð síðasta fundar:** Helga Thorlacius las fundargerð framkvæmdarráðsfundar 2004. Ekki voru gerðar neinar athugasemdir við hana. En Ingibjörg kom með fyrirspurn um verkefni Unicef, hvort deildir hefðu styrkt það sérstaklega. Halldóra í Beta-deild sagði að þær hefðu sent 50.000 kr. framlag til verkefnisins.
4. **Markmið og starfsemi samtakanna:** Ingibjörg Einarsdóttir minnti á handbókina góðu sem gott væri að fletta upp í. Hún fór síðan yfir markmið, sögu, starfsemi samtakanna, heiti og tákni (sjá glærur). Hjá henni kom meðal annars fram að á Íslandi væru 9 deildir, en einungis átta eru virkar. Við erum þar með næstfjölmennasta landssambandið í Evrópu. Hún velti einnig upp þeirri spurning, hvers vegna konur mættu illa á þing eða fundi. Formenn deilda þyrftu að fylgja tölvupósti vel eftir og passa vel upp á að allir væru með. Hún bað formenn jafnframt um að senda ritara landssambandsins fundaáætlun, svo hægt væri að setja hana á heimasíðuna okkar. Varðandi fundi í deildum hvatti Ingibjörg formenn til að sjá til þess að setning fundar væri formleg og einnig fundarslit. Það væri einnig ákveðið aðhald að bera kveðjur frá þeim sem ekki komast á fundinn. Þá væri gott að hafa í heiðri táknið okkar og deildir þyrftu að eiga kertastjaka og vasa eða skál fyrir rósirnar. Hún harmaði að útgáfa félagatals hefði dregist vegna þess hvernig komið væri fyrir Zeta deildinni á Austfjörðum.

5. **Frá landssambandsþingi:** Eyrún Ísafold Gísladóttir sagði frá síðasta landssambandsþingi. Hún taldi þingið virka sem vítamínsprautu, einkum kærleikurinn og vináttan milli félagskvenna. Henni fannst líka gaman að sjá hversu vel undirbúningsnefndin hefði unnið saman og haldið utanum alla þræði eins og ósýnilegur her. Hún varpaði fram þeirri spurningu hvort ekki mætti endurskoða flutning á skýrslum formanna á þinginu. Þá hefði heiðursviðurkenningin til Guðrúnar P. Helgadóttur vakið okkur til umhugsunar og gert okkur enn stoltari af að tilheyra þessum frábæra hópi. Það væri gott að eiga þessar góðu fyrirmyndir.

Í matarhléi gæddu konur sér á samlokum, súkkulaði og kaffi og notuðu tímann til að spjalla um daginn og veginn!

6. **Starfið framundan í deildum:** Formenn deilda sögðu frá því helsta sem deildirnar hyggðust gera næsta vetur.

Alfa-deild ætlar að halda áfram að kynna sér tölvunotkun barna og unglinga. Hyggjast fá kynningu á SAFT verkefnum (<http://www.saft.is/>) - Samfélag, fjölskylda og tækni og vinna út frá því.

Beta- deild gerði áætlun til tveggja ára síðastliðið haust. Þær ætla að halda áfram að vinna með sjálfstyrkingu og leshópa. Þær hafa stofnað *tengslatrió*, þar sem þrjár konur hvetja hver aðra til þátttöku í verkefnum vetrarins. Vetrarstarfið hefst 17. september með ferð um Eyjafjörð undir leiðsögn Braga Guðmundssonar lektors við HA.

Gamma- deild hyggst aðallega taka fyrir tvennt í vetur. Í fyrsta lagi „Að læra að lifa í lýðræði” þar fá þær fyrirlestur Sigrúnar Arinbjarnardóttur um lýðræði og kynningu Sesselju Snævar um verkefnið „Þungamiðja í nemendalýðræði” (<http://www.menntagatt.is/>). Í öðru lagi „Framtíð í nýju landi”, þar sem fjölmening verður skoðuð. Þær hefja vetrarstarfið 16. september með því að fara í heimsókn til Stellu Guðmundsdóttur í Heydal í Mjóafirði. Þær ætla þær að vera með sameiginlegan fund með Iota konum frá Ísafirði.

Delta- deild ætlar að skoða styttingu skólanáms. Þær hyggjast fá fyrirlestur um þau efni. Einnig ætla þær að heimsækja Gljúfrastein og vera með aðventufund í Reykholti. Soffía velti líka fyrir sér kostnaði við að fá fyrirlesara á fundi. Í umræðum í framhaldi af því kom fram að reynt væri að fá konur innan félagsins til að vera með fyrirlestur á fundum.

Epsilon- deild ætlar að halda áfram með verkefnið „ Handverk og hugvit” þar sem fléttast inn nýsköpun og hvernig kennslu er háttáð á því sviði. Þær hyggjast heimsækja Stóra Núp í Gnúpverjahreppi, fara í haustlitaferð að Þingvöllum og heimsækja Gljúfrastein um leið.

Eta- deild gerði tveggja ára áætlun í fyrra og eru nú á seinna ári með þrjú þemu sem eru: List og verkgreinar í skólastarfi, leiðtogar í skólastarfi og að kynnast betur innbyggðis.

Peta- deildin ætlar að skoða nýtt byggðasafn í Garði og nýjan skóla Akurskóla í Innri Njarðvík. Síðan er konum skipt í hópa sem skipuleggja hvern fund.

Ekki voru fulltrúar frá **Iota-deild** á Vestfjörðum og **Zeta- deild** á Austfjörðum á fundinum.

7. **Drög að framkvæmdaáættun 2005-2007:** Ingibjörg Einarsdóttir kynnti drögin. Lagt er til að allar deildir fjalli um og komi á framfæri mikilvægi aðstæðna og umhverfis með tilliti til námsárangurs.

Innra starf deilda/markmið samtakanna:

Lögð verði sérstök rækt við eflingu félagskvenna.

Mikilvægi hvefrrar félagskonu ávallt í brennidepli.

Kynning starfa félagskvenna bæði innan deilda/
milli deilda og víðar í samfélaginu.

Virkja félagskonur enn frekar og gæta vel að mætingum.

Útbreiðsla:

Fjölgun félagskvenna í flestum deildum.

Stofnun nýrrar deildar á Reykjavíkursvæðinu.

Vorþing:

Tillaga kom um að halda vorþing þann 6. maí á Reykjanesi.

Hver deild fær 20 mínútur á þinginu til að kynna starfsemi deildarinnar á líðandi starfsári. (Brot af því besta!!, gæti verið fyrirlestur, en alls ekki skýrsla formanns flutt með hefðbundnu sniði.)

Undirbúningur í höndum menntamálanefndar og landssambandsstjórnar.

Stjórnir deilda tryggja að lágmarki 8-10 félagskonur á vorþing.

Útgáfu- og upplýsingamál:

Efla fréttabréfið og nýta vel til kynningar á félagskonum.

Vefsíðan efld.

Nýtt félagatal gefið út á haustdögum 2005.

Erlend samskipti:

Tilnefna konur í nefndir og til forystu.

Hvetja konur til að birta greinar í Bulletin og senda inn efni á Eu-foria.

Efla samskipti milli íslenskra og erlenda deilda (vinadeildir).

Hvetja konur til að flytja fyrirlestra á vegum samtakanna á innlendum og/eða erlendum vettvangi.

Styrkir:

Efla námsstyrkjasjóð og hvetja konur til að sækja í sjóði alþjóðasamtakanna.

Afmælisár 2007:

30 ára afmæli 28. mars 2007. Gaman væri að allar deildir hefðu fund á þessum degi til að halda upp á daginn.

Sérstök afmælisnefnd hefur verið skipuð sem vinnur að undirbúningi í samvinnu við menntamálanefnd og landssambandsstjórn.

Gróðurreitir:

Í tilefni afmælisins verði fundinn og undirbúinn gróðurreitir/reitir sem Delta Kappa Gamma fær til eignar og ræktunar. Gæti verið einn reitur eða reitir í hverjum landshluta.

Samstarf við Skógrækt ríkisins hugsanlegt.

Nokkrar umræður urðu um framkvæmdaáætlunina. Kristín Ólafsdóttir sagði það athyglisvert hversu mikill áhugi væri á listum í mörgum deildum. Getum við haft áhrif á lagasetningu um kennslu í þessum greinum. Getur stjórnin sent ályktun, þar sem ýtt væri við þeim sem völdin hafa? Ingibjörg Einarsdóttir taldi að það mætti stofna nefndir innan deilda til að fjalla um þessi mál.

Bergþóra Gísladóttir kom með spurningu um hvernig staðan væri í samþættingu námsgreina. Krístrún Ísaksdóttir sagði að í vetur yrði gerð úttekt á stöðu list – og verkgreinaí skólakerfinu.

8. **Evrópuþingið í Turku:** Rósa Kristín Júlíusdóttir gerði þinginu góð skil. Þema þingsins var „*Moving forward excellence in action*“. En Finnarnir höfðu svo valið þemað „*Forests-Finnish Roots and Identity*“ sem undirþema. Margir fyrirlestranna tengdust skóginum og einnig skemmtiatriðin. En fyrirlestrarnir voru fjölbreyttir og fjölluðu meðal annars um félagsþroska, erfðafræði, finnska menntakerfið og Pisa niðurstöðurnar. Eitt atriði nefndi hún sem var skemmtileg nýbreytni var kynning á listakonu frá hverju þátttökulandi. Rósa kynnti Sveinbjörgu Hallgrímsdóttur, grafíklistakonu frá Akureyri. Ellefu konur sóttu ráðstefnuna frá Íslandi. Þær voru allar virkir þátttakendur í ráðstefnunni. Anna Þóra, Ingibjörg og Kristín fluttu erindi. Krístrún og Sigríður Jónsdóttir tóku þátt í Evrópu Forum auk þess sem þrjár konur tóku þátt í nefndarstörfum. Rósa sagði að eitt af því sem gæfi því gildi að vera í þessum samtökum er að sækja svona ráðstefnur og hitta aðrar konur, mynda tengsl og síðast en ekki síst sá lærdómur sem þar er miðlað.
9. **Styrkir og viðurkenningar:** Anna Þóra Baldursdóttir hvatti konur til að skoða á Netinu hvaða styrkir væru í boði. Hún kynnti síðan þessa styrki: (**Námstyrkjasjóður**) **International Scholarship** er ætlaður til að styrkja framhaldsnám eftir meistaranám. **World Fellowship** til framhaldsnáms að loknu grunnnámi. **Íslenski námstyrkjasjóðurinn** til að styrkja félagskonu til þess að fara með erindi/framlag á fundi eða þing erlendis eða til að vinna ákveðin verkefni. **International Speakers Fund** Styrkir konur sem vilja halda fyrirlestur á ráðstefnum samtakanna. **Educator's Award** er viðurkenning til rithöfundis sem hefur skrifað athyglisvert rit um menntun, þarf að vera á ensku. **Leadership Development Seminar** er stjórnunarnámskeið í tvær vikur í samvinnu við háskóla í Bandaríkjunum.

Doctoral Dissertation Award er viðurkenning fyrir bestu doktorsritgerð félagskonu.

Lucile Cornetet Award til að sækja seminar eða fyrirlestraraðir sem ekki leiða til gráðu. Verkefni þurfa ekki að vera á vegum samtakanna.

10. ***Fjármál:*** Guðbjörg M. Sveinsdóttir bað formenn að sjá til þess að árgjöld yrðu send á réttum tíma. Þau þurfa að hafa borist gjaldkera í október. Árgjaldið er 5000 kr. sem var samþykkt á landssambandsþinginu.

11. ***Önnur mál:*** Rósa Júlíusdóttir sagði það vera á stefnuskrá Evrópusamtakanna að stofna deild í Danmörku. Bað konur að láta vita ef þær þekktu danskar konur í menntageiranum.

Ekki voru fleiri mál á dagskrá fundar og formaður slökkti á kertum og sleit fundi eftir sköruglega fundarstjórn.

Helga Thorlacius